



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Masoud Pezeshkian
Iran tir kumogo

West Ham-i Wolves nungi
defender Kilman alizukogo



VOL. XXI ISSUE NO. 265 (ADOK 265)

DIMAPUR AMUNGNÜ (SUNDAY)

CHITENI (JULY) 07, 2024

₹ 5.00

Governor Ganesan-i NLA session jazüker

Dimapur, July 6, 2024 (TYO): August 6, 2024 nungi 14 buba Nagaland Legislative Assembly indang session pungububa tenzüksü ta Nagaland Governor

La. Ganesan-i metetdaksüogo. August 6, 2024 anepdang 9:30 ako nungi Nagaland Legislative Assembly session tenzüksü ta pai ashi.

Putuonuo Hospital Kohima complex tasen lapok

Kohima, July 6, 2024 (TYO): Chief Minister Neiphiu Rio-i Honibarnü Daklane nung Putuonuo Hospital Complex tasenba lapoktsüogo.

iba mozü ki kishi lapoktsü aser kümtem süia arudang temelenshi aika lia aruogo, ta Rio-i ashi.

"Putuonuo hospital indang putiotsü kanga tajung lir kechiyong iba ya Kohima jila nung mezüngbuba nija mozü ki lir" ta CM Rio-i ashi.

"Nija mozü ki lapokba kibongi mangdang tulu ayuba aser meranga inyakba ajanga nisung taküm aika kümzükogo. Iba complex tasen ajanga mozü ki tenzükertem, staff aser nübor ajungai bendanga agütsüba kuli sayur" ta paisa ashi.

"Tanü iba mozü ki complex tasen ka nung belenoker aser asenoki ki tasen masü saka anepalubam bendanga agütsüba aser lokti tenzükba senmang atema benjungteper" ta pai ashi.

Tanü sentong nung Managing Director Dr. Kezevituo Keditsu-i 1990 nung iba nursing home tenzükba osang lemsatop.

Küm 34 tejakdang Kohima nung nübor tem anepalutsü atema

Iba mozü ki ya pa tetsü asür Putuonuo tenüng nung jaloktsü ta Dr. Kezevituo-i ashi.

Kohima nungi ponger aoba tasü mang angu

Dimapur, July 6, 2024 (TYO): June 27, 2024 nü Dzuvuru ayong nung arishi küm 25 tain Rendemo Odyuo ponger aoba sülen tanü pa mang nguogo.

ashi.

July 7, 2024 nü Wokha district kübok Phodong resort anasa Pangti nung angopurtemi Rendemo Odyuo mang angu.

June 29 nungi Rendemo bushitsü tenzükba liasü saka tsüngsü kecha mengutetba agi anogo pungu bushitepa aruba sülen mapa anena liasü. ajsüaaka onoki anameta yimtsüngtem dang tasü mang ngura osang sangoktsütsü metetdakja liasü ta Nodal Officer Jonjibemo-i ashi.

Angopurtemi Tzuza Eryu nung Rendemo mang angu ta Wokha District Disaster Management Agency Nodal Officer L Jonjibemo Odyuo-i

Police-i teinyaktsü ajak inyakba sülen tasür kibong ket nung mang agütsüogo ta paisa ashi.

Rahul Gandhi-i Manipur semdangtsü akok

Guwahati, July 6, 2024 (Agencies): Congress MP aser Lok Sabha nung Leader of Opposition Rahul Gandhi-i July 8 nü Manipur semdangtsü osang angazüker.

arudang nisung 220 tema taküm samaogo.

Rahul Gandhi-i relief camps kar semdangtsü aser Manipur Congress lennirtem den ajuruteptsü ta party osang ajanga ashi.

"BJP-i tesempatep indang politics inyakbaji Manipur ya tatishitsü tajung lir. Narendra Modi, BJP aser RSS atemabo Manipur state ya India nung shilem ka masü ama bilemer asütsü akok" ta Rahul-i taküm küm tetenzüklen Manipur semdangdang ashi.

Pai Moirang aser Churachandpur semdangtsü aser idakji relief camps nung jenoka alirtem den ajurutepa sensaksemtsü.

"June 29 sülen Manipur ya Manipur masü aküm. Manipur state lemsa aser tesem ajungalen tesempatep prokshi. Nisung lakh aikati takoksa ajuru. Nisungtemi pei tenüki agi ngua temeimertem taküm tembang. Tang tashi Prime Minister-i nenok nüktzü aidoktsütsü aser nenok teka amtsü atema marur. Iba ya maaksü lir. PM Modi, BJP aser RSS atema Manipur ya India nung shilem ka masü ama bilemer alitsü südi" ta Rahul-i ashi.

Rahul Gandhi-i Manipur kübok Thoubal nungi Bharat Jodo Nyay Yatra tenzükba liasü. Manipur nungi Mumbai tashi iba yatra ajanga state 15 nung kilometre 6,700 tema sema senzü.

July 8 nü Manipur semdangba sülen Rahul Gandhi-i Nagaland semdangi apusotsü akok ta osang ajanga ashi.

Taküm küm tetenzüklen Manipur nung rally ka nung jembidang Rahul-i BJP kanga aija liasü.

Kuki aser Meitei nung tsüngda rara ya May 2023 nung tenzük aser küm tema süia

Mokokchung nung municipal aser town council-tem nung mendenpur shimogo



Mokokchung Municipal Council Chairman, Wb. Imkongchuba A. aser Dy. Chairman, Wb. Lanuakum.

Mangkolemba Town Council Chairman, Wb. Süpongtsüngba aser Dy. Chairman, Wb. A. Meren Walling.

Tuli Town Council Chairman, Wb. Purtoshi aser Dy. Chairman, Wb. Alemchuba.

Changtongya Town Council chairman, Wb. Temjennungsang aser Dy. Chairman, Wb. Talimoo.

Mokokchung, 6th July (TYO): Tawa ULB election nung shimteter Mokokchung Municipal Council (MMC) züngsem parnok 18 prong July 5, 2024 nü tenangzükba agir külen, tanü July 6, 2024 nü Mokokchung Deputy Commissioner conference hall nung par 18 rongnung election agia Wb. Imkongchuba A (Dilong ward), MMC Chairman aser Wb. Lanuakum (Salangtem ward), Deputy Chairman asütsü asoshi mulunga shimogo.

Council nung, Wb. Purtoshi (Shitikolak ward) aser Wb. Alemchuba (Longlilenden ward) na Chairman aser Deputy Chairman shimtetogo. Changtongya Town Council asoshi Wb. Temjennungsang (PWD ward) aser Wb. Talimoo (Longchara ward) na Chairman aser deputy Chairman shimtetogo. Chairman aser Deputy Chairman shimba maparenji Mokokchung Deputy Commissioner, Thsuvisie Phoiji ajanga election maparenji ketdang asü.

Council, Changtongya Town Council aser Mangkolemba Town Council-tem nung PDA councilor-tem asoshi tenüngsang agütsüba sentong ka ayongzükba aka.

Mangkolemba Town Council atema Wb. Süpongtsüngba (Kumpani ward) aser Wb. A. Meren Walling (Luyong ward) na Chairman aser Deputy Chairman asütsü shimogo. Tuli Town

PDA councilor-tem atema tenüngsang agütsüba sentong aka

Mokokchung Municipal Council (MMC), Tuli Town

Iba sentong nung NLA Speaker, Wb. Sharingain, MLA & Advisor, Wb. Imkongmar Longkumer, MLA & Advisor, Wb. Temjenmenba, NDPP aser BJP nungi tongti ketdangsürtemi shilem balala agia liasü. Iba sentong nung RD & SIRD Minister aser NDPP Mokokchung Region Minister In-charge, Wb. Metsübo Jamiri shilem agütsüba liasü saka koda masüba maparen kar ajanga pa medentet.

Manipur Christian teloki MP Akoijam nem tenüngsang agütsür

Imphal, July 6, 2024 (Agencies): Manipur nung Khristan tamanger telok balala longjemer tentetba All Manipur Christian Organization (AMCO)-i Manipur MP Dr. Bimol Akoijam nem tenüngsang agütsüogo.

ta AMCO-i ashi. Dr Bimol Akoijam lenisüba kübok temelenshi tajung angutsü, tamangba yimsü temeten kümzükba ayutsü aser Manipur nung yimjung bener arutsü amanger ta AMCO-isa ashi.

balala inyakba atema tenüngsang agütsüba metetdaksüogo.

Dr Akoijam-i Parliament nung Manipur state aser sensotem medena kanga tasü itta jembio

AMCO-isa sorkar aser sendaktepa alirtemi state nung yimjung aser putepshitsü mapa

Külen, Manipur nung tzümet süng aser anentsüh amala alima lendong balala atalokba atema khuret abener ta AMCO-isa ashi.

Parnokisa Manipur nung alir ajak dang temeim, teputep aser yimjung nung alitsü mepishia metetdaksü.

India nung light tank ka yangluogo; 2027 nungi amshitsü

New Delhi, July 6, 2024 (Agencies): Honibarnü India-i light tank ka sayaogo aser iba tank ya 2027 nungibo amshitsü imlar.

kati ashi.

kati ashi.

Iba tank ajanga India sepaitemi Line of Actual Control (LAC) nung China anema inyakba maparen akangshitsü.

Gujarat kübok Hazira nung Larsen & Toubro facility nung DRDO tanishir Samir V Kamat-i Honibarnü tank indang mezüng prototype reprangdanga liasü.

Larsen & Toubro aser Defence Research Development Organisation (DRDO) yaritepa yangluba light tank dang Zorawar ta jaloktsüogo.

Larsen & Toubro aser Defence Research Development Organisation (DRDO) külemi 25-tonne tank ya yanglu. Indian Army nungdakba peritsütsü atema parnoki küm ana tsüngda Project Zorawar kübok iba tank yanglu. Tang ya Indian Army-i light tanks 354 nungdaker.

Chinese People's Liberation Army-i LAC nung light tanks dena modern tanks aika yua lir.

1834 nungi 1841 tsüngda Ladakh aser Tibet nung general Zorawar Singh-i trokben tashi Dogra forces anir takok ngua raraa liasü. May 1841 nung general Zorawar-i nübo 5,000 Dogra force anir Tibet telungi ai aser China sepaitem madak takok ngur parnok indang Mantalai wako agiteta liasü.

"Iba tank ya LAC nung kanga junga amshitetsü. Taruba küm ana tsüngda lisem lima aser tenemtem nung summer aser winter trials alitsü" ta ketdangsür

Indian Army-ia Ladakh theatre nung Russia nung yangluba T-72 aser T-90 tanks yua lir saka item tank ya lenden aser lisem lima nung dang senzütsü yangluba lir. Iba jagi Indian Army-i light tanks nungdaka liasü aser iba mapatong nung Rs 17,500 crore shi endoktsü.

India nung local defence production kanga renlokbaji 2023-24 financial year nung liasü ta Defence Minister Rajnath Singh-i metetdaksüba sülen anogo ka lir tanü light tank sayaogo.

"Iba tank ya tayimtsü ajanga bener otetsü aser mapa tapu aika inyaktet" ta ketdangsür

Community Health Care Drive Sentong agi



Impur, Chiteni/July 6 (TYO): Impur Christian Hospital ajanga maneni Community Health Care sentong ka Chakpa nung July 4, 2024, anogo kanga takok ngua agiogo. Iba sentong nung palliative patient dena arua temang anebalua liasü. Ajak agi nisung 112 nem treatment tajung den mozü agüja anebalua liasü.

Tanü temang anebaluba mapa ya kija aser lokti anema alitsü asoshi kangasa tongtipang shilem ka lir. Aji oda, ajakibo mozüki bushia temang anebalu mesüteter ta angateta, nüngdakba pur ajak tongtetsü asoshi iba sentong agiogo.

Dr. Aka Longchar, MS, ICH aser Dr. Alem Jamir Officer, ICH tena leniba nung iba sentong agi. Mrs. Narola

Walling, Chaplain, ICH, ajanga iba sentong achaayanga agia liasü.

Maneni Impur Christian Hospital ajanga yimtsüngtem kwikatasa odir Tsüngrem tatenba lia aika asoshi teyari tulu anguba mapang asütsü imlar atar, ta ICH Chairman, Board of Trustees Dr. Sashimeren Aier-i sangdong ka ajanga metetdaksü.

Pungro nung Sampoonata Abhiyan amenokogo

Dimapur, Chiteni/July 6 (TYO): MLA & Advisor Home Guard & Civil Defence, Fire and Emergency Services, Relief & Rehabilitation S. Kiusumew Yimchunger-i July 5 nü Pungro kübok GHS hall, Salomi nung Sampoonata Abhiyan for Aspirational Block Khongsa amenoktsüogo.

Sentong nung o jembiba mapang Advisor-i, Sampoonata Abhiyan nukla densema terenlok maparen balala atema lokti-i anir shilem agitsü nüngdakba lemsatepa liasü.

Sentong nungsa lokti pela

agizükba o jembiba mapang Deputy Commissioner, Kiphire, Temsuwati Longkumer-i Aspirational Block program indang metetdakja liasü.

Kasa mapang nung Young Professional & State Nodal Dr. Shelley Dahiya, aser State Young Professional Nagaland Ngayaipam A. Shimray natia sentong nung o tatsütsü jembia liasü.

Sentong nung KAPO nungi züngsemtem aser Village Council Chairman, Salomi nungeria shilem agi aser parnoki Khongsa Block nung tebilemstütem

lemsatep.

Maneni sentong nung block nungi Nurses, AWW, aser ASHA workers tem rongnungi mapa tajungtiba inyakertem nem naroküm agüja liasü.

Iba sentong nung DC, Kiphire-i achaayanga sentepa aliba lokti tenangzüktepba agia liasü. ABF Khongsa Sukanya lenisüba nung iba sentong agi aser EAC Pungro & Nodal Officer ABF Yithachu-i tepela o jembia liasü.

Iba sentong tembangba sülen exhibition stall tem MLA & Advisor-i lapokja liasü.

Minister Kruse-i Daklane Panchayat ki tasenba lapoktsü



Kohima, Chiteni/July 6 (TYO): Nagaland Minister for Women Resource Development and Horticulture, Salhoutuonuo Kruse-i, Kohima Smart City Mission kübok Honibarnü tawa yangluba Daklane Ward 7 indang Panchayat ki lapoktsüogo.

Sentong nung o jembiba mapang lai, iba mapa takok ngua tembanga inyakba atema kiyong lenirtem aser Smart City Development Limited nem tenüngsang agüja liasü.

Daklane ya 8-Western Angami kübok la indang Assembly Constituency nung shilem ka lir ta shia lai Daklane nung alirtemi election mapang la nem teyari agütsüba ajanga iba kiyong la atema kanga tongtibang lir ta ashiba den tarutsü nung takokba tashi teyari agütsütsü nangzüka liasü.

Laisa, colony nung aliba nüburttem dang maneni longjemer alitsü aser kiyong ajungtsü atema lenirtem nem

maneni teyari agütsütsü ajungshia liasü.

Maneni minister-i, lar department ajanga kiyong nung alirtem nem takokba tashi teyari agütsütsü nangzüka liasü. Nüburttem nem teyari agütsütsü atema sorkar department tem fund angur saka department ketdangsürtemi aikati aji melemsateper, ta Kruse ashiba den nüburttem ajangzükdaktsütsü atema takokba tashi teyari agütsütsü asoshi lai atidaka malitsü, ta shisem.

Kasa mapang nung Executive Engineer KSCDL Imsunaro-i, technical report tatsüka agütsüba mapang, KSCDL amenokba mapang nungi Smart City Mission kübok urban infrastructure melenshiba nung KSCDL-i tongtibang shilem agia arudar, ta ashi.

Daklane nung Community ki ka yangluba ya Area Based Development strategy nung shilem ka ama lokti facility

ajungkettsü nükjidong nung inyakogo, ta lai ashi.

Iba project ya M/s Engineering Station-i contract agizüka sen crore 2.48 intoka yangluogo. Ki ya ali 4,623 sq. ft nung yangluogo, ta laisa shisem.

Tender inyakyim tembanga inyakba aser work orders agütsüba sülen panchayat ki ya 2022 küm March 31 nü nungi yangluo tenzüka liasü aser ita 18 tsüngda tembanga 2023 küm Septemper ita 12 nü yangluzüka liasü, ta Executive Engineer KSCDL Imsunaro-i ashi.

Panchayat ki semzükbä sentong ya Daklane Panchayat general secretary Vitshu Vizo lenisüba nung agi aser Apostolic Ministries president Rec Dr D L. Sanchu-i ki bendanga agütsüba sarasadem agia liasü. Maneni sentong nung Daklane Panchayat chairman Vibeilie Metha-i lokti pela agizükba o jembia aser Akhavi Tsuipu-i tepela o jembia liasü.

Naga Hoho-i asükhu lemsatep

Dimapur, Chiteni/July 6 (TYO): Naga Hoho-i sangdong ka ajanga, July 5, Hokolbarnü nikongtsütsü Eno Raitu Elu Dimapur nung asüba osang angazüka mang ayimba lemsatepogo.

Eno Raitu Elu tasü mang ya July 6 nü Peren District kübok par yimtsüng nung remtsüogo.

Eno Raitu Elu ya nübür asoshi bilemba Naga nung social worker ka aser Zeliang nung rongnungi tangar ajungmesoba lenir tajung ka liasü. Pa Naga Hoho nung 2015 nungi 2019 tashi

Committee on Naga Political Affairs (CONPA) züngsem ka liasü. Ano pa Zeme Naga Council tir liasü.

Pa asüba ya takoksa tulu aser pa kin asoshi lenir tedangshi ka aser par kibong asoshi tebu aser adianu ka akoksaogo.

Naga Hoho-i asür kinungertem asükhu lemsateper aser pa tanüla teyanglur den anisüngzütsü atema bendanga agütsür, ta General Secretary Atoho K Kiho-i sangdong ka ajanga lemsatep.

Minister Temjen Imna Along-i Global Open University semdang



Dimapur, Chiteni/July 6 (TYO): Minister of Higher Education & Tourism, Temjen Imna Along-i July 6 nü Chumoukedima district kübok Sodzulhou-Kozabe yimtsüng

nung amendaka aliba Global Open University Nagaland semdangogo. Minister meina Sentiyanger Pongen, Additional Secretary, Higher & Technical Education, Nagaland aser Imsongmeren, Joint Secretary Tourism na den tanga ketdangsürtem oa liasü.

Dr. Utkarsh Sharma, Director & Head WIBP Special Observer Group for Nagaland, Dr. H.N. Dutta, Vice-Chancellor, TGOUN aser tanga ketdangsür tejentemi Minister nem

narojong ka agüja pa pelashishia agizük aser university indang sentong aser terenlok maparen balala indang metetdakja liasü.

Minister-isa, university ketdangsürtem den pa tebilemba lemsatepba den parnok den onük balala sensaksema liasü. Pai, Nagaland nung aliba kaketshirtem state nung azüngtsü atema jangra küm daksütsü asoshi alima ajunga nung amshitetsüsa professional programs tem benoktsü ajungshia liasü. Paisa, Department of Higher Education den longjemer Nagaland nung alirtem mapa aser tanga ketdangsür nung anioktsü nüngdakba lemsatepa liasü.

MLA, Pongshing Phom-i Shamakok Fuel Station semzüksü

Dimapur, Chiteni/July 6 (TYO): MLA, A. Pongshi Phom-i July 5 nü Longleng nung Shamakok Fuel Station semzüksüogo.

Fuel Station semzüksüba sentong nung o jembiba mapang A. Pongshi Phom-i, Longleng nung ano fuel station ka amenoka lokti nem teyari agütsüba atema Shamakok Fuel Station kibur S. Yanger Angh nem tenüngsang agüja liasü.

Fuel station ya Highway nung amenoka lir asünung iba ajanga district nung totzü agi tebilemstü aliba bentetsü, ta Phom-i ashi. Paisa, nüburttem dang iba station ya takokba tashi amshitsü aser kümzüka ayutsü ajungshia liasü.

Sentong nung N. Tialemba Phom, Executive Secretary, PBCA-i iba station bendanga agüja sarasademtsü aser Meyizungba, SDO (Civil), Longleng; President, PPC Y.B. Angam, aser Orangkong Village Council Chairman, Khamnyei Phom nungeria o tatsütsü jembia liasü.

Iba sentong ya I. Imli Phom lenisüba nung agi aser Pastor, Orangkong Baptist Church Pangpent Phom-i Tsüngrem temaotsü meshizüka sarasadem. Sentong nung NGO balala, lokti tentet balala lenirtem aser nüburttemi shilem agia liasü. Maneni fuel station kibur S. Yanger Angh-i tepela o jembia liasü.



Chennai nung ozüng alema inyaker telok kati Tamil Nadu BSP Tir, K. Armstrong tepsetba anema July 06, 2024 nü Chennai nung Bahujan Samaj Party (BSP) pusemertem Rajiv Gandhi Government Hospital kima adenshir longkak aيتدang tangokba noksa nung angur.

Tamil Nadu nung BSP Tir K Armstrong tepset; nisung ti puogo

New Delhi/Chennai, July 06 (Agencies): Tamil Nadu nung BSP Tir, K Armstrong tepsetba anema Honibarnü Chennai nung Bahujan Samaj Party (BSP) nung inyakerterem Rajiv Gandhi Government Hospital kima adenshir longkak sashia aitogo. Hokolbarnü Armstrong tepsetba sülen Honibarnü party nung inyakerterem aser party pusemertem jenti hospital kima adenshir longkak aita 'aibelenertem aputsüla', 'Iba ken o CBI nem agütsütsüla' ta yimyim ayim. Longkak aitertemisa state chief minister MK Stalin dang iba tatalokba nung ajemdaker CM menden nungi alutsüla, ta takhangba agütsü. Tensa azüoktsü atema

hopsital kimaji police aika adenshia liasü. Perambur, Chennai nung mejangjaba nisung kari Armstrong par ki anasa tepseta liasü. Iba tatalokba sülen kiyong nung dokan ajak shibang aser Metropolitan Transport Corporation (MTC)-ia bus services ajak anena liasü. BSP Tamil Nadu tatong Tir, Nayayanan Thirupathy-i, Chief Minister Stalin-i pa menden nungi anentsüla, ta takhangba agütsü. Iba tatalokba dak sendakba nung tang tashi nung Chennai police-i temelung melemi nisung ti pua lir. Tamalen ozüng alema inyaker, Arcot Suresh tepsetba mangyanga Armstrong tepset asütsüa akok, ta police-i bilemer.

CCTV noksa asadangka sülen mobile tower locations aser motorbike registration numbers nung ajemdaker nisung tiji melung melemi apu. Parnok ajakji Kuravar kin nungi lir. Chief Minister Stalin-ia mangyim jashi lemsataper aser iba tatalokba tekaraba nung bushisüngdanga aibelenertem nem temerenshi agütsütsü, ta nangzük. BSP tongti lenir, Mayawati-i X ajanga, "Taochi makai Tamil Nadu state Bahujan Samaj Party (BSP) Tir, K Armstrong par kima tepsetba ya aitsütsü tetemsü. Pa ya advocate ka liasü aser state nung Dalit nung atema nokdaker ka liasü. State sorkari aibelenertem nem temerenshi agütsütsüla," ta metetdaksü.

July 10 nü assembly menden 13 atema election agitsü

New Delhi, July 06 (Agencies): Tawa Lok Sabha election agia Centre nung sorkar tasen akümba sülen maneni July 10 nü state tenet kübok assembly menden 13 nung BJP-i aniba NDA aser Congress-i aniba opposition INDIA teloktep tsüngda tokteptsü.

asert Maniktala, Tamil Nadu kübok Vikravandi, Madhya Pradesh kübok Amarwara, Uttarakhand kübok Badrinath aser Manglaur, Punjab kübok Jalandhar West aser Himachal kübok Dehra, Hamirpur aser Nalagarh assembly constituency mendentem lir.

Assembly by election agitsü aliba mendentemji Bihar state kübok Rupauli assembly, West Bengal kübok Raiganj, Ranaghat Dakshin, Bagdah

Party balala nungi MLA tem süadokba agi item menden azüngteta election agitsüsa aküm. July 10 nü election agiba sülen July 13 nü vote zünga osang sangdongtsü.



Delhi excise policy ken o dak sendakba nung July 06, 2024 nü New Delhi nung AAP lenir Manish Sisodia, Rouse Avenue Court-i anir aodang tangokba noksa nung angur.

Gujarat nung Congress-i BJP tamakok ngudaksütsü: Rahul Gandhi

Ahmedabad, July 06 (Agencies): Honibarnü Congress lenir, Rahul Gandhi-i, tawa Lok Sabha election nung Ayodhya nung Congress-i BJP tamakok ngudaksütsü ama taruba Gujarat election nunga par party-i BJP tamakok ngudaksütsü, ta ashi. Gujarat kübok Ahmedabad yimti nung party nung inyakerterem den jembidang Congress MP aser Lok Sabha nung Opposition lenir, Rahul Gandhi-i, "Ayodhya nung Airport yangludang aluyimertem ali makai aküm. Ram tekülem ki semzükba sentong nung adentsü atema Ayodhya nungi nisung ka danga mejaok, ibayongji Ayodhya nung alirtem jashia liasü," ta pai ashi. Rahul-isa, Ato kilonser Modi-i Ayodhya nungi toktepnüa liasü saka pa atema sentong asameyangertemi pa dang Ayodhya nungi tetoktep, kechiyong nai tamakok angutsü aser yimtenren jenjang tembangadoktsü, ta pa dang shia liasü, ta metetdaksü.

Rahul Gandhi-i, "Parnoki (BJP) asenok amokmerenba aser asen office raksatsüba ajanga asenok jazüker. Parnoki asen office raksatsüba ama asenok senteper par sorkar raksatsütsü. Ya zülüoka yuang-Congress-i Gujarat nung tokteptsü aser Ayodhya nung asenoki inyakba ama Gujarat nunga Narendra Modi aser BJP tamakok ngudaksütsü," ta ashi. "Ram Mandir semzükba sentong nung adentsü atema Ayodhya nungi nisung ka danga mejaok, ibayongji Ayodhya nung alirtem jashia liasü," ta pai ashi. Rahul-isa, Ato kilonser Modi-i Ayodhya nungi toktepnüa liasü saka pa atema sentong asameyangertemi pa dang Ayodhya nungi tetoktep, kechiyong nai tamakok angutsü aser yimtenren jenjang tembangadoktsü, ta pa dang shia liasü, ta metetdaksü.

Faizabad constituency nung BJP-i tamakok anguba dak sendakba nung Rahul Gandhi-i, "Ram tekülem ki asütsü atema Ayodhya nung tesem merüktetsü asoshi nüburtem ket nungi ali aika agi, saka tanü tashi Narendra Modi sorkari parnok nem temenok sen magütsür. Tanabuba nung Ayodhya nung aluyimertem meyong ali nung international airport ka yanglu, aser parnok nem-a temenok sen junga magütsü. Tasembuba nung Ram tekülem ki semzükba sentong nung Ayodhya nungibo nisung kata maliasü, ibaji ajanga nüburtem kanga jashi. Item kuli ajanga Ayodhya nung NDA-i tamakok angu aser INDIA teloktepi takok angu," ta ashi. Paisa, Ayodhya nung Ram tekülem ki semzükba sentong nung Adani aser Ambani nung erbo liasü saka sensakertembo ka danga maliasü, ta ashi.

Finance Minister Sitharaman-i July 23 nü Union Budget benoktsü

New Delhi, July 06 (Agencies): Honibarnü Parliamentary Affairs Minister, Kiren Rijiju-i, July 22 nungi Parliament nung 2024 Budget Session tenzüktsü aser August 12 nü tembangtsü; July 23 nü Lok Sabha nung Union Budget benoktsü, ta metetdaksü.



Nirmala Sitharaman

India nung Union Budget tenetben tashi benokba mezüngbuba Finance Minister ji Nirmala Sitharaman akümtsü. Tamalen Morarji Desai-i Union Budget trokben benoka liasü. Desai-i full budget pongu aser interim budget ka benoka liasü. India sorkari benokba nung ajemdaker linük Tiri July 22 nungi August 12 tashi Parliament House anaprongla nung Budget senden alitsü agizükogo.

asert alima tesem balala nung rara alidang asen linük rongsenkettzüng yamaji ina liasü. Iba ya tesüba küm 10 tsüngda benokba mapatong balala ajanga lir. Alima nung rongsenkettzüng ainba nung India kijai shilem 15 contribute asür. India ya alima nung rongsenkettzüng tulutiba linüktem rongnung jenjang asemubaba akümtsü atema ozü sorkari inyakdar," ta laisa metetdaksü.

Taoba hopta Parliament House anaprong külem senden nung jembidang linük Tir, Droupadi Murmu-i, taruba budget senden nung tongtibang mera aika agitsü aser rongsenkettzüng dak sendakba tongtibang telemtetba aika agitsü, ta metetdakja liasü.

Ato kilonser Narendra Modi lenisüba kübok Nirmala Sitharaman tang agi tanabenbuba Union finance minister inyaker.

Droupadi Murmu-isa, "India ya alima nung rongsenkettzüng tulutiba linüktem rongnung jenjang pongububa kümogo. Tesüba küm 10 tsüngda tensa mapang tamajung ajuruaka rongsenkettzüng ainba average ji 8% liasü," ta metetdakja liasü. "Alima nung wara alidang

2024-25 kümsük atema interim budget February 1, 2024 nü Modi 2.0 sorkari benoka liasü. Tang Centre nung teloktep sorkar tasenbai jenjang metui linük rongsenkettzüng aintsü aser NDA sorkar tenangzükbatem nung rangloker budget benoktsüa akok.



Bodh Gaya, July 06, 2024: Tibetan yimsü lenir, Dalai Lama arrshi küm 89 ajungba anogo nung Mahabodhi tekülem kidang Buddhist putirtem benjungtepdang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JULY (CHITENI) 07, 2024

Tsüngremer tembartem

Asenoki aiben asenok ya Tsüngremer lar amato bilemer aser yamaji jembir. Ajisüaka, Tsüngremi ashiba angaa Pa den külemi jajaritemji alar masü aser kilira masü saka Tsüngremer tembartem lir. Ibaji Yisu Khristai Yohan 15: 15 nung yamai jangjajangjaa shia lir, " joko, ni nenok dang kilirtem ta majar, kechiyong kilirtemi parnok kiburi kechi inyaker memetetter, saka ni nenok dang tembartem ta ajar, kechiyong ni kübu nungi angashiba ajak nenok nem metetdaksür." Asenok asoshi osang tajungji ibaji ka lir. Iba osang jagi tetsübu aser tarendak samadaksür. Alima nung asen tembar tajung aliba agi timtem nung teyari angur aser tejashi nung mulung süngzüker. Tsürabur maliyonga tembar tajung lira, kangabo shisamebulur kechiyong tembartem dakji asenoki temulung alemer. Ajisüaka, Tsüngrem den tembar ayimbajibo alima tembartem den atishiteptsüla masü. Atangji, asenok ya Tsüngrem tembar asütsü yangluba masü mesüra asenoki Tsüngrem den tembar kümnüba agi akümtsüba masü. Ibaibo Tsüngremi asenok dang taochi balaka sayua jatetba mapa ka lir. Akhi tejen putu nung Tsüngrem ashia angaa pa tsüngsü nung jajaritem aika liaka, Tsüngrem tembarbo ana dang liasü. Kaji Abraham. Pai Tsüngrem den kanga anasa jajaba agi Tsüngremi pa dang "Kü tembar" ta aja (Isaia 41:08). Ano kaji, Mosa. Tsüngremi Mosa denbo tembar den jembir ama tejak o tejak na jitepa jembiba otsü ka asenoki Anitet 33:11 nung angutsü. Ibaji tepelatsü aser tesüngmangtsü mapa ka lir. Atangji, Tsüngremji temeim Tsüngrem, anungji Pai asenok ajak anepalur. Pa temeim agi asenok ajak kümzüker, ajisüaka asenokibo Pa asoshi tajung kecha meinyaktetter. Aji oda, Tsüngremi Pa tembar asütsü shimtetsüsa taküm yimya nung litetba nisungji tesüngmangtsüka lir. Tanü asenoki Abrahami amangba ama Tsüngrem dak mamangtetter aser Mosa ama asenoki asen nübortem asoshi aria mebilemer. Ajisüaka, Tsüngremi asenoka Pa tembar asütsü shimtetba maongka aser taochiji koda tulu asütsü. Yisui Pa nütüngtem dang Pa tembar asütsü ta ashiba kuliji ka liasü. Ibaji Tsüngrem miim o ajak Pai parnok dang ashi, kechiyong Pai parnok dak temulung lemteta liasü. Aji oda, tebu Tsüngremi Pa dang kechi ashi aser Pai Pa nungi kechi angashi, item ajakji Yisui nütüngtem lemsatet. Iba temulung lemtetba jagi Yisui Pa nütüngtem nem Pa dak aliba ain aser tashi ajak agütsü. Iba ain aser tashi nung Yisui alima nung inyakba sayatenya mapa ajak nütüngtemi inyaktet. Tanüa Yisui asenok ajak ya Pa tembar sünür. Pai asenok nem Pa dak aketba ain aser tashi ajak agütsüner. Pai asenok ya Pa tembar kümer yariner. Yisu alimai aru aser asenok menen atema kangki nung timtemseta asü saka shia aru. Iba timtem aser takok ajanga joko asenok Tsüngremer lar masü aser kilira masü saka Tsüngremer tembartem aküm. Koda tepelatsü aser jangratemtsü. Iba jagi tanüla nung kanga asüküma bilemer. Alima nung tulurtem den tembar akümtsüabajibo yutsür, nungdak tila ashitsü atema ken ajuteptsüa tasak aser majurutepteter. Ajisüaka, Yisui, joko nenok kü tembar, anungji kodangsa nenok nungdak adokdir kü dangi arung, kü dang shiang ta ashiba temeim o ji asenok asoshi tesüngmangtsü taochi o asütsü. Iba taochi o ji asenok rongnung kari danga mangashii lira mesüra angashiyonga iba toachiji magiteta lira, tanü Yisui asenok dang nenshia ashir, "arung, nenok tebelemer aser kureta abenertem, ni nenok nem anisüngzüker agütsüdi." Asenoki tama masü Tsüngremiang tama asenok meim aser tanüa Pai asenok den tembar kümner. Tsüngrem den tembar kümer alitsüba taküm aser kibongji koda jangratemtsüka asütsü. Tsüngrem den tembar akümbajibo alima chuba aser yimsüsürtem meyirijang den tembar akümba dang nungi kanga agia taoba aser tajungba. Nai naji Tsüngrem tembar masü amato bilemra, iba yimobilem ya züngzüker, nü mulungsentsü aser tanüla ajak agi Tsüngrem bushiang aser Pai nü dena tembar ayimtsü.

OLEMSABANG

NAGA NUNGER TAKAR ASER TZÜMAR TAKAR TEPILA

~ L. Kika Pongener.

(Yashi adok nungi...)

Asen mimchir ya karbo kangasa tia maka sempet kanga tamajung lir. Manga (House Fly)-i teshinem menemba tesem nung dang linuba ama...Kangasa tesasatsüka, karibo tanü pei jenjang junga lir ta ser...Nisung o nisung na arishitepa/tsükchitepa alitsüba sentong dang atonger...Tangar denbo oda yutsür, pei adianu, pei kimang sosem, pei kin-kidong den dena arishitepa/tsükchitepa alitsüba sentong atonger. Ajisüaka, tanü aseni inyakba ajak jagi tarutsü nung asen lenmang lepbangtsü/shibangtsü ta pei sasa meshisadanger...!!! Nisunger ya kanga tia maka...Karbo tera kaa-ita jenjang junga lira, iba dakji temulong ulur, menungdakba ajak nung nisung den tsükchitepa/arishitepa alitsüba sentong dang atonger. Ano kangasa tesasatsüka, karibo lokti sunep-sunepa lia aliba, mepetmesu/telemsa adoktsüsa, ken o tapu-tapu yanglua, asa-lendong tapu-tapu atonger. Aji oda, takar-a suang, sensaker-a suang, alima nung tatsüka alidang, nisung den tsükchitepa/arishitepa dang alitsüba kanga jangrademtsübo masü. Shirnoki nisung den tsükchiteptsü aser lokti nung mepetmesu adokdaksütsü sentong atonger parnokji kangasa tia maka...!!! Ashiko, kenubo asen ket nung rongsen aser tashi (Power)-ji meli-i küma aotsüa kecha meteta maka...!!!


Asen mimchirtemi teti asenji jenjang junga aser kaa-ita alitsü ama bilemer tang ashi...Asen mimchir tiaji Tsüngremi acha-ayanger. Aji oda, tanü karbo tepetzük tia alar jenjang nung liaka, ashiko, kenubo chuba menden nung amentsüsa ajungkettsü Tsüngremi koka lir. Tsüngrem o-i ashir..."Pai ali nungi sensaker ajungketer; Aser maka-maiter ruja nangdenba nungi ajungketer" (T.Ken-113:7)...Ano karbo tanü chuba menden nung mena liaka, iba nungjagi alii yima attsür alutsü Tsüngremi koka lir. Tsüngrem o-i ashir..."Ni alartem kor nung sanger angu, aser chubatem alar ama ali nung jajaa angu" (Sayu-10:7). Anungji tanü jenjang junga lir ta ser teti iba amaji alitsü ama bilema kangabo mezü-meküma asüküm masütsüla. Tsüngrem o-i ashir..."Asung indang ne sasa mezümeküm tesu; Kechiyong anogoi kechi bener arutsütsü nai memetet" (A.Shin-27:1). Atangji, mimchir tiaji Tsüngrem ket nung lir. Tanü asen jenjang junga lir ta ser tashiyim agi tangar kar ajemoka yutsüra...Kenu asen dak, asen chirnur dak aser semchi-semnur dak küsaji inyaksüsa mapang ka arutsüa shibai metet...!!! Anungji tanü asenji kechi koma-ka kaa-ita, jenjang junga, ulua liaka, ajemalua tila kümer tulu-tila ajak den yimjung nung alitsüla.

Ano asen Naga nunger dak aketba jakla tamajung kaji, tanü asen kaa-ita lir ta ser..."Azüi takokba dak senteper angu ama"...Kijasor aser tilar-bo kanga mezüngmeshir. Kechiba sura parnok dakji tajidaksü aser tetsükdaksü kecha mali. Otsüla-oboula nungeri shin o jembiba,..."Kümlü-junger" dak nisung aika aibelener...Pai-bo kecha meshitetsüji ta ser temulong ulua inyakang aika aibelener. Aji oda, pai/lai asen nija anema kecha tamajung inyaka mali sernung, aseni-bo tashiyim agi tamajung inyakra...Tangar nuktsü yima kü-küa/khurema jashidaksüba kenu aseni meyipa agitsü. Tsüngrem o-i ashir..."Ne dang tamajung kecha inyaka melira; Kecha masü nung nai nisung ka den terara" (A.Shin-3:30). Ashiko, tanübo asen tashi (Power) aser nütüng-nubu dak tsükdaker nisungibo kecha meshitetsü akok...!!! Saka Tsüngrem-ibo shitetsüsa mapang ka arutsü...Saka ajibo kangasa tesasatsüka asütsü...!!! Anungji nisung tsüngken metsübuyongjia, Tsüngrem tsüngken tsübu tanü takok asaa masü, saka tarutsü tia bilemdanga jembitsüla aser inyaksüla. Aji oda, shirnok nem Tsüngremi rongsen moaja, jenjang junga lidaksür, ibaji Tsüngrem'er maongka tulu ta angateta...Tsüngrem tenung kanga sanga alima aser nubur asoshi mapa tajung inyaksüla. Tsüngrem o-i ashir..."Kibuba dak amangang aser tajung inyakang; aji sura na ali nung taso shia alitsü" (T.Ken-37:3).

Asenoki tzümar libaliroba reprangdangra...Parnok sobaliba tajung maka, pei pei dang liteper. Parnok kati ka yaritepba kangabo mali. Tzümar yimden-yimli, loktiliba, yimtsür-yimer telongjem, sentep-senji, lokti-senden, saru-saji kecha maka. Anungji kaa-ita aliyongjia pei atema dang-ashi, tangar den aser lokti den lemsatetba kecha maka. Ajisüaka, asen Naga nunger sobaliba tajung kaji, taka-taiter aliba agi sensakertem parnok dak atsükoker alir. Takartemi sensaker nem angadi mesu-aka tsükdem agüja chiyungdaksür aser apotsür. Yimden aser loktiliba koda masü alidang, taka-taitertem tongzüka atar, item ajakji asen sobaliba tajung lir. Takartem shirnoki iba ama mapa tajung inyaker, Parnokji Tsüngremi chirnur/semchi-semnur tashi moatsütsü. Ajisüaka, ano kaa-ita liaka takar karibo teka mesalar. Tsüngrem o-i ashir..."Nisung kati mukürui agütsür, saka tali akar. Tangar kati tagütsütsü tim soita ayur, saka tanüng dang tendaksür" (A.Shin-11:24). "Ne keti inyaksü tashi alidang shir dang tajung inyaksü tsüa ali parnok dang nungi soita teyu" (A.Shin-3:27). Anungji Tsüngremi moatsüba rongsen agi, alima aser nubur ajangzüksüba mapa nung amshitsüla. Aji oda, aseni tim masüba lenmang nung amshira, ashiko, chirnur/semchi-semnur mapang nungbo rongsenji tangar keti aotsü akok. Tsüngrem o-i ashir..."Nisung tajungi pei semchi-semnur nem senmangtsü toktsür. Saka temenapur rongsenji Temeshipur asoshi rizünger" (A.Shin-13:22).

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Indonesia nung Tenla kidang kiyimba sentong tagidak mapang nokdang



Surabaya (Indonesia), July 06 (Agencies): Indonesia linük nung ketdangsertemi Tenla kidang Khristantem kiyimba sentong tagidak mapang nung nokdang aser iba Arogo nungji joko tekülem sentong kecha magitsüla, ta tuyu.

Taoba Amongnü (June 30, 2024) Java Island nung Tarik District kübok Mergosari yimdak yimsüsür tongti, Eko Budi Santoso-i Pentecostal Church in Indonesia (Gereja Pentekosta di Indonesia) Tenla kidang kiyimba sentongji nokdanga liasü.

Iba tesem nung Tenla ki permit mali aser area nung alirtemia iba Tenla kidang tekülem sentong agiba anema ola adoker, ta shia joko iba Tenla kidangi sentong kecha magitsü tuyua liasü.

Ajisüaka iba area nung alirtem jagibo Tenla kidang Khristantem tekülem sentong agibaji parnokki mashishir, ta metetdaksü.

Yimsüsür Eko den sorkar ketdangser pongui kiyimba sentongji tembanga agitsü memelai Pastor Yoab Setiawan kimai anizüka aluba sülen pastor dang, iba tesem nung Tenla ki alibaji kiyongertemi ashishir aser iba tesem nung Tenla ki asütsü atema permit mali, ta metetdaksü.

Iba mapang nungji Pastor

Setiawan-i sorkar ketdangsertem dang, yimdak yimsüsür indang office anasa tetsürtem teküp (pei mang) ayokertemji tama nokdangang, ta ashi.

Tensa tamajungba akümba nokdangtsü atema pastor kinüngtsü, Lidya Laviyanti-i ketdangsertem dangji tatok meshiba den külemi lai, "Onoki timtem kecha magütsür. Onok dang tai tokang, nenok nem iba ya angatetdaksüner. Onok ya tesem balala nungi adenshiba lir. Onok nütsüng kanga ajema lir aser Arogo nütsüng ishika dang, anungji yimlibilema angatetdaksüner," ta ashi.

Community association aser neighborhood association nung tongti Eko-isa, inyaksangshi balala atema tamasa neighborhood association dang temelaba meshitsüla, ta ashi.

House of Prayer ji local government report certificate ka ajanga temelaba ngua liasü. Yaküm December 7 nü Christian Community Guidance Regional Office lenir, Luki Krispriyanto-i certificate nungji sign süa lir, ajisüaka Eko-i iba certificate ji pai memetet ta ashi, ta International Christian Concern (ICC)-isa metetdaksü.

Mergosari yim ya Surabaya nungi kilometer 15 shi pilar lir. Ketdangsertemi Tenla kiji nokdangyonga Khristantem

dang, nenoki kidangbo tekülem sentong agitsü akok, ta ashi.

Senden nung sorkar ketdangsertemi, Arogoi Tenla ki atema permit tama meshiba sülen ang tekülem sentong agiang; permit meshitsü atema ita ka mapang agütsür, ta metetdaksü.

Ketdangsertemi, "Permit renemba mapang nung nenoki pei kidang tekülem sentong agia alitsü akok. Iba tetezü tekülem agitsü atema nenok nokdang masü," ta metetdaksü.

Kiyong nungji alirtemibo Khristantem tekülem sentong agiba ajanga parnok nem timtem kecha magütsür, ta shiogo.

Setara Institute for Democracy & Peace nung deputy chairman, Bonar Tigor Naipospos-i, "Yimsü kar magizütetba teloktem sorkar ketdangsertemi pusemer," ta metetdaksü.

"Yimtenren aser election dak sendakba nung yimsü kar magizüktetba teloktem teyari agitsü nükjidong nung sorkar ketdangsertemi item ama teloktemji pusemer," ta Bonar-i ashi.

Tang alima nung Khristantem alitsü linük tamajungtiba 50 rongnung Indonesia ya jenjang 42buba nung lir (Open Doors' 2024 World Watch List).

ANO GO ABEN TSÜNGREM DEN

TSÜNGREMER
TENÜNGLOKTSÜBA

Khrista shibai ni tashi itdaksür pa dak ni ajak inyakta Khrista Filipi 4:13; KIBUBA Tsüngremi nisungji ani akok. Eden atsüki inyakdaksütsü aser anütsü yutsü. KIBUBA Tsüngremi nisung nem ozüng agüja ashi, Atsüki nung atangba süngjang ajak nai achitsü akok... Lipok 2:15

Libajen tetezü temeküt aliba mopungsem balala, alima yimyatem, lia aruba, taliba yimyatem, libaliro jenjang balala environment dang ajar.

Tsüngremi alima aser teyangluba ajunga anogo terok nü tashi yanglu. Tsüngremi nisungji Eden tsüki nung yutsü aser Pai parnok nem ozüng agütsü, Nenoki yangi mapa inyakang, chiyungtsütem Chiang aser nüngdak ajunga bendena agiang, aser ajak tiptema tobur junga yuang. Kechiba süra Tsüngremi meimchirtem PA mesükba nung Pa ama yanglu. Tsüngremi miemchir ajak odangba meyanglu, nüngdak ka kar-ang yanglu. Tsüngremi meimchirji pa den sendaktepa lidaktsünü, pa den tamang ka nung lidaktsünü, pa dak amangdaksünü aser pai meimchirtem pa ama odang meim.

Tsüngremi tienyaksü mapa ana agütsübaji; PA meimtsü aser pei adianu meimtsü, teyangluba ajak tasü aser taküm aliba ajak acha-ayangtsüba nungloktsü

Tanü asen nem nungloktsüba mapa khen reprangshidi. Meimchir nem tekolok shisatsü balaka Tsüngremi agütsü, aseni ampangyima aser merumerua süngtong-lidong, ozü- sangnu, shirurutem, ali aser teyangluba ajak mamshili. Tsüngrem angateta anebalua ketdang südi.

Vietnam nung jail nung puoka aliba Khristan 11 bo samaogo

July 06, 2024: Vietnam linük nung aliba jail nung puoka alir Khristan 11 samaogo aser ibaji ajanga Vietnam nung Khristantem reshikangshiba jenjang sayur, ta International Christian Concern (ICC)-i metetdaksü.

Khristan 11 ji Protestant trok aser Catholic pongu lir. Parnok ajakji 2011 küm nungi tenzüka 2016 küm tashi nung mapang balala nung jail nung puokba liasü. Ajisüaka tangbo parnok 11 ji kong aliar memetet samaogo.

Protestant Khristantem- Ro Mah Pla, Siu Hlom, Rmah Bloanh aser Rmah Khil nung jagi linük telongjem anema inyak, kechiyong parnokki Degar

Protestantism nung shilem agi, ta aija liasü. Degar Protestantism ya Vietnam nung Communist sorkari magizükba tentet ka lir.

Degar nisungtem dangji Montagnards ta ajar. Parnok ya Vietnam kübok Central Highlands nung alir tribal lisopurtem lir.

Vietnam War mapang nung Degar nisungtem aikati United States yaria liasü aser parnok aika Khristan yimsü dangi meyipogo.

Campaign to Stop Torture in Vietnam teloki ashiba agi, "Sorkar ketdangsertemi mapang shia Montagnard Khristantem dang yimjak nung Khristan yimsü tokjang ta rongshir. Tetuyuba

tashi mangai independent house churches nung adenertem dakbo azüker, apur aser jail nung puoker."

Protestant Khristan- Ro Mah Pla, Siu Hlom, Rmah Bloanh aser Rmah Khil nung dak alia tanüngba Protestant Khristan ana jagi Khristan yimsü toktsütsü memelungba agi jail nung puoka liasü.

United States Commission on International Religious Freedom (USCIRF)-i report ka ajanga, ketdangsertemi Protestant Sung A Khua'er ki raksatsüba sülen par kibong yimdak nungi meindok. Tesülen par kibong yimdaki tanaben arudaksü saka Sung-i par ki asütsü atema süng

aika lenoka arem moapu kümdaksü, ta tai tonglokja pa pua jail nung puok.

Ano Protestant, Y Hriam Kpa-i Tenla ki shibangtsü memelungba agi apu.

Catholic pongu- Runh, AKuin, A Tik, Run aser Dinh Kuh nungeri Ha Mon Catholic Church nung shilem agiba ajanga linük telongjem anema inyakogo, ta tai tonglokja apu. Iba Arogo yaa linük nung Communist sorkari memelaba Arogo lir.

Khristan 11 ji tangbo jail nung mali anungji süadoker asütsüa akok ta bilemer.

Khristan 11 samaba dak alia USCIRF-isa Vietnam nung jail

nung puoka alir Khristan pezü kanga mejungi reshikangshiba osang metetdaksü.

2018 küm Vietnam sorkari Law on Belief & Religion ta ser ozüng tasen ka benoka liasü. Iba linük nung Khristan telok balala aser tanga yimsütem beshitsü melar saka sorkar ketdangsertemi parnok inyaksangshi ajak mita repranger aser azüoker.

Kasa ozüng kübok yimsü dak sendakba reju aser telok balalai registration tama agitsüla.

Vietnam nung Arogo aika kangshia anendaktsüogo aser pastor kar dangbo Arogo nung züngsemtem ajak tenüng meshia liasü.

AO OSHI ANGAZÜKDAK: TANÜ ANGAZÜKTSÜBA OJANG



Taitsü

(adj) tangar yirutsüsa jembiba o (hurtful words)

* Nisung karibo teti taitsü keta dang jembir.

Tajak

(adj) tenarongi mangashiba (deaf)

* Tenarong tajak purtem den teka-temeyong amshia jembir.

OLONG PAITEP # 6839

1			2			3			4	
			5		6		7			
8										
			9							
	10									
									11	12
			13				14			
15						16				

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 6837 TELANGZÜBA

TIPIEN :

- 2. Tesasa, 5.Sen, 6. Warok,
- 7. Kaset, 8. Temin, 11. Süjak,
- 13. Talak, 14. Sadok, 15. Ola,
- 16. Amajok.

LANGTSÜNGLEN :

- 1. Suwar, 2. Teroto, 3. Satan,
- 4. Jenti, 7. Kinük, 9. Okadak,
- 10. Atala, 11. Salem, 12. Saket.

NAI-A YA METETTER MA



Alima nung jenjang tasaktiba guitar ji 'The Eden of Coronet' lir ta World Record Academy-i metetdaksüogo. Hong Kong nung amenoka aliba Aaron Shum Jewelry-i Gibson den yaritepa parnok brand Coronet atema iba guitar yanglu.

Eden of Coronet ya Gibson SG guitar lir aser iba guitar ya 18-karat white gold agi yanglu aser 11,441 diamonds enoka lir. Iba guitar ya 2015 küm yangluzük aser idangji Guinness World Records-i world's "most valuable guitar" ta jalokja US\$2 million alang lir ta metetdakja liasü.

Meghalaya nung tasü mang pezü angu

Shillong, July 6, 2024

(Agencies): Meghalaya kübok East Jaintia Hills district nung nisung pezü teka aser tetsüng süngzü agi aleneter sür lia angu.

Honibarnü Umleng yimtsüng tezülen nisung pezü indang tasü mang angu aser parnok tekong nung arangba zübotem keta liasü ta police-i ashi.

"Mapa inyakertemi Honibarnep tasü mangtem angu. Onoki bushisü ngdang südar" ta East Jaintia Hills SP Giri Prasad-i ashi.

"Nisung pezü ya state nung alirtem masü ta onoki temulung melemi bilemer saka maitsü mejangatet tashi osang tejangja meshitettsü" ta pai ashi.

Nisung pezü tasü mang angudakji parnok tepset mesüra tanga tesem nung tepseter Umleng nung tasü mang bener arua yutsü asütsü akok. Onoki iba onük ana jangjatsü atema kulitem bendener, ta SP Giri Prasad-isa ashi.

TENÜNGSANG AGÜTSÜR



Tamasa ni aser ozü kibong ajanga asen Marepkong sanger ajak dang asen Kümtetdakba Yisu Khrista tenü ng nung Tsü ngrem temeim salem den kanga pelaba lemsateper, aser iba ULB election nung takok konang aser maongka ya asen Marep sanger nem agütsür. Tanü nungi asen ward sanger tebandang kecha makai longjemer maparen ajak nung shisatsü tajung agi ajungshitepa aser teyaritep nung asen Marepkong lenla ajak nung temelenshi adokdakja inyaka aotsü nenok nungi ama-litep maneni aginer.

Maneni Shir. Shariangain Longkumer, Speaker NLA, Mokochung Region NDPP, 26 Aonglenden A/c NDPP, Marepkong Unit 26 A/c NDPP aser Well Wishers ajak dang pelaba lemsateper. Talisa shirnokisa sarasadem ajanga aser maparen balala nung yaritepogo, nenok ajak danga kangasa pelaba lemsateper.

Tsü ngremi asen Marepkong Ward nung aliba nutsü ng nübu ajak moajangma.

Kanga Pelar

Sd/-
Mrs. Repanungla
Elect, Councilor, MMC
Marepkong Ward No. 16

Sivasagar nung Class 11 kaketshir kati school principal tepset

Guwahati, July 6, 2024

(Agencies): Assam kübok Sivasagar nung Honibarnü class 11 kaketshir kati par school principal tepset.

Iba lendong ya Sai Vikash Academy ta ser senior secondary school & coaching centre nung atalok.

Kaketshir jagi school principal Rajesh Babu kotari agi

tsü ngset. Tena ya academic tsütsü mangatetep ka adoka liasü ta osang angazükter.

Principal-i artsüba atema tejashi nung kaketshir jagi iba mapa inyak ta ashir aser police-i bushisü ngdang südar.

Iba mapang Babu tekolak aser tuku nung kanga mejungi yiru. Pa mozü kidangi anir aodang len tom nung asü.

Nisung kari tasü sangji principal ta ashir saka tesayur karibo paji shisaliok reju undang manager liasü ta ashir ta police ketdangsür kati ashi.

Police-i kaketshirji puogo saka pa tanur asüba yong legal procedures kar inyaker. Tensa metettsü atema CCTV reprangdangdar ta police ketdangsürisa ashi.

BJP-i Northeast state tem atema party in-charges shim

Guwahati, July 6, 2024

(Agencies): Bharatiya Janata Party (BJP)-i Northeast state 6-Manipur, Meghalaya, Mizoram, Nagaland, Sikkim aser Arunachal Pradesh atema party in-charges shimogo.

BJP-i Arunachal Pradesh in-charge atema Assam minister

Ashok Singhal shim. Parnokisa Manipur in-charge atema Dr Ajit Gopchade shimogo. Gopchade ya Maharashtra nungi Rajya Sabha MP lir.

Maneni, Meghalaya aser Nagaland BJP in-charge atema Anil Anthony shimogo.

Mizoram in-charge atema

Bihar MLA Devesh Kumar aser Sikkim in-charge atema Bihar MLA Dilip Jaiswal na shimogo.

BJP-isa Northeast states nung co-ordinator atema Sambit Patra aser joint co-ordinator atema V Muraleedharan na shimogo.

Manipur nung AR aser police-i bunkers 2 raksatsü



Imphal, July 6, 2024

(Agencies): Kangpokpi district kübok S Mongpi Ridge nung sepaitemi telungpurtem indang temporary hideouts/bunkers ana nguteta makdago.

Assam Rifles-i Manipur Police den külemi Honibarnü mita aodang bunkers ana ngua raksatsü.

Iba mapang parnoki 303 rifle, 9mm pistol, 12-bore single barrel, long-range improvised mortar aser tanga osettem nguteta liasü ta Defense Wing-

i metetdaksü.

Ano, Tengnoupal district kübok Yangoubung yimtsü ng nunga prangpong-injang aliba osang tejangja ka angazükba sülen Area Domination Patrol ka ao.

Iba mapang sepaitemi lathode gun, 9mm pistol, locally made pompi, locally made mortar, single barrel guns aser injangtem ngutetogo.

Sepaitemi prangpong-injang ajak 1 Manipur Police ket nung agütsüogo.

Hokolbarnü Angel Children Hospital and Vaccination Centre nung staff-i Uripok Achom Leikai nung alirtem den külemi lungkak aitba sentong ka agiogo.

July 4 nü mejangjatetba nisung kari hospital amakba anema parnoki iba sentong agi.

"Iba tatalokba atema sasa bilemer. Iba mozü ki ya küm ana tejakdang ang lapok aser nübortem tenzüktsü atema lapokba lir. Ajisüaka iba tesempatsü mapa inyakba atema jashir" Angel Children's Hospital Managing Director Dr. Naorem Yaikhomba Khuman-i ashi.

Iba tatalokba ajanga hospital staff tetsübu tia ka nung lir. July 4 nikongdang 5:40 ako meta mejangja nisung kari reception counter nung injang khaloktsü aser idangji aina ajak jaksatsü.

Masoud Pezeshkian Iran tir kümogo

Tehran, Chiteni/July 6 (Agencies): Tawa Iran tir atema election nung shimsang Masoud-i, takok anguba sülen mezüngbuba olen lemsatepba mapang, pai Iran nungur ajak sentoka metoktsütsü ta tenangzükba agüja liasü. Tir election nung pai Saeed Jalili koka liasü.

"Aseok jakdang lenmang tasak lir aser nenoki teka amteper minyakra aser tamang makatetra iba lenmang ya anep anepabo mesüitetsü," ta Pezeshkian-i Honibarnü X sabang ajanga ashi.

"Ni nenok nem teyari agütsütsü aser iba lenmang nung nenok shinga sentoka metoktsütsü ta tenangzükba agütsür. Nenokia ni tesentok," ta pai zülutsü.

Ministry of Interior-i Honoibarnü sangdong ka ajanga ashiba agi, "Hokolbarnü vote agütsütepba nung vote timba anguba sülen Pezeshkian Iran indang taruba tir kümogo."

Vote million 30 dak tema agütsüba nung Pezeshkian-i vote shilem 53.7 mesüra vote million 16.3 ngua liasü. Jailil-i vote shilem 44.3 mesüra vote million 13.5 ngua liasü.

Ministry-i iba osang sangdongba sülen Jalili-i pa tamakok anguba nangzükogo aser ashiba agi, shiba südir süaka nüburtemi shimbaji akümtsütsütsüla.

"Asenoki pa akümtsütsütsüba dang masü saka asenoki pa tashi ita tejakdangi aotsü atema asen tashi ajak amshia pa nem teyari agütsütsüla," ta pai ashi.

Result sangdongba sülen linük nung benjungtepba kecha maliasü, saka Pezeshkian pusemertem telok tila kati yimtung nung benjungtepa liasü.

Linük balala nungi lenirtemi Pezeshkian nem pa takok asoshi

tenüngsang agütsürtem rongnung Russia tir Vladimir Putin-a densema liasü aser pai, "na tir ama inyakba mapang linük ana tsüngda bilateral tesendaktep tali tashi taibba akümtsü imlar," ta ashi.

Election nung nüburttem shilem 49.8-i shilem vote agüja liasü. Candidate pezü rongnung Pezeshkian kija moderate liasü, shiba Iran alima nem lapoktsütsü atema tenangzükba agüja liasü. Pa den tokteper Jalili ya taoba mapang nuclear negotiator ka liasü, shiba Russia aser China den Iran tesendaktep akangshitsü atema ajang ajanga nokdaker.

June 28 nü vote agütsüba mapang Iran nungur voteer shilem 60 dak tema-i election nung shilem magütsü atema telemteba agia liasü. May ita taoba tir Ebrahim Raisi helicopter tsükokba lendong ka nung asüba sülen tir tasen ka shimsü asoshi election agütsütsüba aküim.

June ita election nung Pezeshkian-i vote shilem 42.5 shi angua aser Jalili-i vote shilem 38.7 ngua liasü.

June ita vote agütsütsü temsüa alir nisung million 61 nungi shilem 40-i dang vote agütsü, koba 1979 küm Islamic Revolution sülen tir election nung nisung ishiba vote agütsütsüba liasü.

Tehran nungi Al Jazeera osangbener Resul Serdar-i ashiba agi, Iran nungur shilem 50 shi-i vote magütsü, kechiyong parnoki election ajanga temelenshi bener arutsü ta tamang makar.

Iba den tangartemi ajema ajema longkak aitiba temaitsü vote magütsü liasü, ta Serdar-i ashi.

Inran tir 9buba ya sentong ka agia linük lenir Ayatollah Ali

Khamenei-i officially mapa nongloktütsüba sülenang parliament nung tenangzüktepa agütsü.

Political analysts temi ashiba agi, Pezeshkian-i takok anguba sülen pragmatic foreign policy ka ajungkettsü imlar aser iba den 2015 nuclear ken o asüngsashitsü aser Iran nung social liberalisation jenjang tajungba kümdaktsütsü imlar.

Tir atema candidate anapronglai linük rongsenketzüng mejungi aliba asüngsashitsü tenangzükba agütsür liasü. 2018 küm taoba US tir Donald Trump-i nuclear ken o nungi atsüngina tenokdangba balala agütsüshiba sülen Iran rongsenketzüng mejungi kümer lir.

Linük nung Pezeshkian inyakyim anemertem aika alitsü aser pai nangzükter alibattem benoka inyaksü atema tasak asütsü, ta Serdar-i ashi.

Theran nung amendaker aliba analyst aser Fars Media Faculty nung professor Mostafa Khoshcheshm-i ashiba agi, Iran foreign police melenshitsu mimlar, koba establishment ajanga aser talisa Supreme National Security Council-i telemteba agir, kong sorkar nungi lenirtem, armed force, Iran lenir aser parliament densema lir.

Maneni inyakyim melenshitsu atema November ita agütsü aliba United States tir election dak tulu ka keta lir, kong maneni Joe Biden aser Trump na tokteptsü.

"Donald Trump tir kümra temelenshi bener arutsü mimlar," ta paia Al Jazeera dang ashi.

Tatem nungbo Khamenei-i benokba state policy mapa kümä inyaksü atema dang Pezeshkian-i inyaktetsü.

Tepela Lemsateper



Lt. Rongsenchiba (Waromung) 20.08.1938 - 24.06.2024

Onoki meima aliba Obala shiranga tenzükba anogo nungi akümlü wadang tempangba mapang tashi kija, kibong, lokti balalai nübo, rongsen, shisatsü aser sarasadem agi shirnokisa yaritepogo, nenok ajak dang kangasa pelar.

Teyanglur Tsüngremi nenok mapa tajung maneni moajangma.

~ Temeim Kinungtsü, Chirnurtem, Semchirtem, Anükapang aser Kinungertem.

Hamas-i cease-fire atema sensaksemtsü mulunga agizükogo

Deir Al-Balah, Chiteni/July 6 (Agencies): US-i Gaza nung shilem balala kümä lemsar cease-fire benoktsü atema benokdangba Hamas-i agizükogo, ajisüaka rara tembangtsü asoshi Israel-i tenangzükba ka agütsütsüla, ta tongtibang takhangba ka agütsüogo, ta Hamas aser Egypt nungur ketdangsür anati Honibarnü ashi.

Hamas puri mulunga agizükba ajanga November ita nungi tang tashi khen danga maneni rara aruba anentsü akok, aser ita aika rara aruba tembangdaktsütsü atema seksasemyonga aotsü asoshi lenmang lapoktsütsü imlar. Ajisüaka telok ajaki iba tenangzüktepa ya kechi südir süaka agitettsü tabo shia matatetsü, ta shiogo.

Ketdangsürtemi ashiba agi, Washington-i cease-fire atema benokba nung mezüng hopta trok rara anena atatsü aser iba mapang Hamas puri pua aliba tetsür, tanur, tantsür tamburtem aser yirur alirtem, Palestine nungur tepuoker noklang aika den melenteptsü. Anogo 42 rara anena ataba mapang Israel nungur sepaitem Gaza nung nüburttem aika aliba tesem nungi atsüngintsü aser northern Gaza nung pei talidak ki toktsür jenshia or alirtem pei talidaki meyipa aotsü atema temelaba agütsütsü, ta ketdangsür ana yagi ashi.




Iba mapang Hamas, Israel aser teyongtsü ia ken o s e n s a k s e m e r t e m i tenangzüktepa tanabuba shilem atema onüktem sensak asemtsü, kong Hamas puri pua aliba civilian aser sepaitem chiokba angutsü akok, ta ketdangsürtem yagi ashi. Iba melena Israel-i Palestine nungur

tepuokertem chioktsü. Tasembuba shilem nung tanungba tepuokertem aser Hamas puri pua aliba mapa asürtem tasümgang chioktsü aser küm ka tepeyong atema kisüjensü maparen tenzüktsü.

Sensaksem mezüngbuba shilem tenzükba sülen, Israel-i teti atema cease-fire benoktsü atema maneni sensaksemtsü ta shia tezüluba nung tanangzükba ka teyongtsü ia jembirtem nungi Hamas puri aginer, ta ketdangsür ana yagi ashi. Ken o teyongtsü ia jembirtemi o agi rara metenzükshitsü aser teti atema cease-fire ka mebenok tashi maneni sensaksemtsü ta tenangzükba agütsüba sülen Hamas puri mulunga agizükogo, ta iba telok nungi lenir kati Associated Press dang ashi.

"Onoki tezüluba nung tenangzükba ka aginer," ta pai ashi. Hamas puri rara khenyongi tembangdaktsütsüba dak alak kecha magütsü ta ashiba ajanga ita aika cease-fire atema sensaksem tenzükli thili ta aruogo. Ato Kilonser Benjamin Netanyahu-i rara anena atatsü atema benokdangogo, ajisüaka Hamas military aser parnok yimsütsüba tashi ajanga mesamatsü tashi aser Hamas puri pua alirtem ajak meyipa anir maru tashi rara manentsü ta tenangzükba agütsüogo.

Tepuokertem chiokba sülen Israel-i rara tenzükshitsü akok ta temulung meleme bilemba Hamas puri taoba mapang lemsatepogo. Kasa mapang nung Israel-ia, Hamas puri tepuokertem mechioki cease-fire ya mapang telatet ka makai benoktsü atema inyaksü akok ta temulung meleme bilemba lemsatepogo.

"Chiyongtsü Kumzükba Ayutsüji Ajak Mapa"

FSSAI License certificate apply asütsü atema mera tem.

- Step 1 - Mezüngbuba nung website www.foscoc.fssai.gov.in lapokang.
- Step 2 - Apply for New License (Screen nung sayua alitsü) nung nemang.
- Step 3 - Premise of operation shimang.
- Step 4 - Select State adoktsü, State shimba sülen nü indang business komalar shimang aser sub-categories nungi komala business ar shimang.
- Step 5 - Annual turnover 12 lakhs/annum dak tema shimang mesüra State License atema MT per annum shimang aser proceed nung nemang.
- Step 6 - Eligibility repringang aser proceed nung nemang.
- Step 7 - Form B nung application details ajak inokang aser Save & Next nung nemang.
- Step 8 - Application Reference No, Company tenüng aser Address sayutsü (Mamai application reference number zülüoka yuang). Food product category shimang aser Save & add nung nemang. Save & Next nung nemang.
- Step 9 - Map nung sayua aliba red marker atsür arua premise location sayuang aser Ok nung nemang.
- Step 10 - Nü indang singup details inokang. Nü indang login credentials mamai zülüoka yuang, koba iba page nung sayutsü. Nü indang password yangluang. Tarutsü nung amshitsü atema nü indang login id aser password mamai yuang. Submit nung nemang.
- Step 11 - Boxes nung aliba application details ajak agüjang. Year of license shimang (License fee tsünglanglen box nung sayutsü). Iba sülen nü indang registered mobile number nung OTP ka arutsü. Iba OTP ji inoker agüjang.
- Step 12 - Nüngdakba documents ajak upload süang aser self-declaration form nung nemang. Save and next nung nemang.
- Step 13 - Nü indang registered mobile number indang esign atema pop up ka angutsü aser proceed nung nemang. Website nung register asüngda agütsüba mobile number ya application form nung agütsüba den kasa asütsüla.
- Step 14 - Nü indang registered mobile number nung OTP ka arutsü aser proceed süang.
- Step 15 - Iba sülen online payment (application fee) atema page ka angutsü aser mode of payment shimang.

***Temeitetsü :** License category atema payment ya installments ana nung agütsütsü. Installment tanabuba ya licensing authority ajanga scrutiny aser verification sülen agütsütsü.

Licensing Authority ajanga nü indang application scrutinized asütsü aser shidak lira processed asütsü. FSSAI License certificate ya generate asütsü aser pasasa nü indang registered Email ID dangi yoktsü mesüra login id aser password amshia nai login sütetsü.

Application mabensa lira, Licensing Authority ajanga nü indang email ID aser nü indang FSSAI account dangi jangshitsü atema query ka yoktsü, koba Licensing authority indang totuyuba nung aliba ama mapang shidak nung telanzükba agütsütsüla.

***Temeitetsü - Imlibilema mobile number aser email ID tejangja agüjang.**

Tali tejangjaba metettsü atema foodsafety@nagalandhelpline@gmail.com nung mail süang mesüra +91 6009970644 nung jembiang.

Mapang - 11:00 a.m-2:00 p.m only
TUESDAY & THURSDAY (mapa inyakba anogo)

State Food Safety Authority,
Department of Health and Family Welfare, Govt. of Nagaland.

EURO 2024: England aser France na semifinal-i iogo



England o Switzerland na asayang tangokba noksa angur.

Chiteni/July 6, 2024 (Agencies): Honibarnü Euro asayamung quarterfinal tasembuba nung England aser Switzerland na asaya penalty metsütepba sülen England-i kokogo.

Asaya atazükja aliba mapang aser mapang apuloktsür minute 120 asayaba mapang telok anaprongla goal kaka dang agütsütetba sülen penalty metsüteptsüsa aküm.

Asaya nung Switzerland atema Embolo-i minute 75buba nung goal ka idakja parnok tejakdang aküm.

Ajisüaka minute 5 dang lir Saka-i minute 80buba nung England atema goal ka idakja goal kasasa aküm.

Asaya nung team anapronglai goal idaktsütsü asoshi maongka angu saka goal magütsütet.

Penalty metsütepba mapang England nung asayar ajaki goal idaktsü saka Switzerland nung asayar Akanji-i metsüba ball Jordan Pickford-i nokdanga par team takok dangi ani.

Iba asaya akokba sülen England semifinal-i iogo aser parnok Turkey mesüra Netherlands den asayatsü.

Hokolbarnü tang asaya aliba Euro 2024 nung Portugal aser France na kanga toktepa asayaba sülen France-i penalty ajanga takok nguogo.

Asaya mapang tembangba aser mapang apulokja minute 120 asayaba tashi nung telok kati danga goal magütsütetba sülen penalty metsüteptsüsa aküm koba France-i 5-3 agi koka liasü.

Penalty metsütepba mapang France nung asayartem ajaki penalty idakja asaya akok aser

parnok semifinal nung Spain den asayatsü. Penalty metsütepba mapang Portugal nung asayar Joao Felix-i post nung ball metsüloktsüba sülen parnok asaya mekoki liasü.

Shoot-out nung takok anguba ajanga France team tali ajungmesotsü, shirnok 2022 küm World Cup nung Argentina-i pelanty nung tsükdaktsü aser 2006 World Cup final nunga parnok Italy-i tsükdakja liasü.

Portugal nung asayar arishi küm 39 tain Ronaldo aser arishi küm 41 tain Pepe na atema iba asaya ya linük tenüng nungi international asaya nung tatembangbuba asaya asütsü ta bilemer.

Tie breaker nung Barcola, Ousmane Dembele, Youssouf Fofana, aser Jules Kounde nung ajaki goal idakja liasü.

West Ham-i Wolves nungi defender Kilman alizükogo

Chiteni/July 6, 2024 (Agencies): West Ham-i Wolves captain Max Kilman pound million 40 agi alizükogo. Pa den küm tenet atema tenangzüktepba yangluogo.

West Ham nung Kilman maneni manager Julen Lopetegui den longjemogo, shibai pa Wolves captain kumdakja liasü.

Wolves pur mezüngo West Ham-i Kilman atema pound million 25 agütsüba magizüki liasü, ajisüaka jenjang ajungkettsüba sülen agizükogo. Wolves-i Kilman ya 2018 küm Maidenhead nungi 40,000 agi alizüka liasü.

Iba tenangzüktepba yangluba sülen National League club ya- a iba deal nungi pound million 4 angütsü.

Tenangzüktepba yangluba sülen arishi küm 27 tain Kilman-i, "West Ham United asayar ka akümba atema kanga pelar," ta ashi.

"Club-i ni alizüktsü tejangraba aliba indang angashiba sülen iba maongka ya metoktsünü liasü, anungji ni kanga pelar.

"Wolves nung ni Julen den jangradema inyakogo. Pa temaba jenjang nung aliba coach ka aser ni pa dang nungi aika angazükogo aser pa lenisüba kübok ni asayar ka ama maneni tajungba kuma aotsü ta temulung lema bilemer," ta Kilman-i ashi.

2019 küm May ita mezüngbuba asayaba sülen Kilman Wolves nungi asayar 151 nung asayaogo aser iba mapang pai goal asem idaktsü.

Pa West ham nung nung goalkeeper Wes Foderingham



Max Kilman

aser Brazil nung winger Luis Guilherme na den longjemogo, shirnok club-i summer transfer window nung alizükogo

Wolves sporting director Matt Hobbs, shiba taoba mapang chief scout alidang Kilman alizüka liasü, pai Kilman-i club toktsür aoba ya tejashitsüka aser tepelatsüka lir, saka ajak atema tenangzüktepba tajung ka agiogo, ta ashi.

Hobbs-i, "club nung pa anema o tamajung jembiba nisung ka danga ni meteta mali. Pai club toktsür aoba sülenang nisung aikati pai ground telung nung kechi inyakteter aji jangjatsü," ta ashi.

Canada Open: Priyanshu-i world No. 4 Antonsen koka semi-i iogo

Chiteni/July 6, 2024 (Agencies): India nung lanur badminton asayar Priyanshu Rajawat-i tang asaya aliba Canada Open nung maneni kanga junga asaya Denmark nung top seed aser world number 4 asayar Anders Antonsen koka semifinal-i iogo.

World number 39 Rajawat-i Hokolbar aonung Antonsen 21-11, 17-21, 21-19 agi koka liasü. Tena tsüingda ghonda ka ser minute 19 asaya liasü.

Ajisüaka tetsür tarep asayar Treasa Jolly aser Gayatri Gopichand nabo quarterfinal nung tsükatokogo.

Third-seeded India tsürla ana ya Chines Taipei tsür Pei Shan Hsieh aser En-Tzu Hung nati 18-21 21-19 16-21 agi koka liasü.

Antonsen akokba sülen arishi küm 22 tain Rajawat-i

tang mezüngbuba top 10 nung aliba asayar ka kokogo. Pa semifinal nung France nung asayar Alex Lanier den asayatsü, koba pa atema World Tour Super 500 semifinal tanabuba asütsü.

Asaya nung Rajawat-i asaya kanga junga tenzük aser mezüngbuba game nung pa 7-4 agi tejakdang liasü, saka Antonsen-i pa menepa point 9-9 aküm.

Iba sülen India nung asayar yagi point pongu atonga angu aser pa tejakdang aküm. Antonsen-i pa menepa asayatsü merang saka Rajawat-i point tenet atonga ngua mezüngbuba game akok.

Antonsen-i tanabuba game nung tajungba asaya saka Rajawat-ia pa den kasa toktepa asaya liasü. Kanga toktepa asaya point 17-17 aliba mapang

world No. 4 asayar yagi point pezü atonga angu aser tanabuba game koka decider asayatsüsa aküm.

Tatembangbuba game nung Rajawat 5-1 agi tejakdang liasü, saka Antonsen-i point trok atonga ngua pa 7-5 agi tejakdang aküm.

Iba sülen Rajawat-ia point asem angu saka asaya tom tashi nung Denmark nung asayar ya 11-10 agi tejakdang liasü.

Asayar ana kasasa toktepa asayaba sülen point 19-19 aliba mapang Rajawat-i point ana atonga ngua pai asaya akok.

Rajawat-i iba asayamung nung mezüngbuba aser tanabuba round nung pa dang nungi jenjang temaba nung aliba Denmark nung world number 24 Rasmus Gemke aser Japan nung world number 33 Takuma Obayashi na kokogo.

ASUD-i tetsür penalty shootout ayongzükter



Dimapur, Chiteni/July 6 (TYO): Ao Students Union Diphupar (ASUD)-i ayongzük July 13 (Honibarnü) nü 1buba open women penalty shootout Diphupar local ground asayatsü. Iba asayamung nung team 20 dak temai shilem agiba angütsü.

Osangbenertem den sensaksemba mapang asayamung ayongertemi ashiba agi, tetsür asayartem nem parnok sempet jangjatsü atema sabang ka agütsütsü nükjidong nung iba asayamung ayongzükogo. Ano iba asayamung ajanga asayartem

longjemtsü atema maongka tajung agütsütsü.

Asayamung dak sendakba nung Ao Baptist Church Diphupar, Pastor, Rev. Dr. N Lipok Jamir-i, ASUD indang official jersey saya liasü.

Asayamung nung takok angurtem nem senpet sen 50,000, tatongdakba nem 20,000 aser semifinal tonga asayaba team ana nem 5000 agütsütsü. Asayamung nung shilem agütsü atema form CT Square, Chumoukedima, Kiran Sports, Nyamo Lotha road, Dimapur aser Diphupar nung angütsü.

Canada-i Venezuela koka semifinals-i iogo

COPA AMERICA

Chiteni/July 6, 2024 (Agencies): Copa America nung mezüngbuba asayaba küm Canada-i maneni kanga junga asaya quarterfinals nung penalty metsütepba sülen Venezuela koka semifinal tongtetogo.

Asaya goal kaka agütsür tembangba sülen penalty metsütep aser Canada-i asaya goal 4-3 agi koka liasü. Penalty metsütepba mapang Venezuela nung asayar Wilker Angel-i metsüba ball Canada goalkeeper Maxime Crepeau-i kanga junga nokdang aser iba sülen Ismael Kone-i ball kanga junga metsüokja Canada-i asaya akok.

Mongolbarnü Semifinal nung Canada pur world champions Argentina den asayatsü. Team

ana ya mezüngbuba round nunga asayaogo, koba Argentina-i goal 2-0 agi koka liasü.

Asaya nung mezüngbuba goal ya Canada atema Jacob Shaffelburg-i minute 13buba nung idakja liasü.

Asaya ya timba Venezuela-i amokbanger asayar aser parnok goal idaktsütsü asoshi maongka aika nguteta asaya arur asaya tanabuba shilem nung minute 64buba nung Rondon-i goal ka idakja goal kasasa aküm.

Iba sülen team anapronglai goal idaktsütsü atema kanga meranga asaya ajisüaka magütsüteti penalty metsüteptsüsa aküm, koba Canada-i koka liasü.

BILEMDANGANG

"Nüsasa na mememra tangar meimtsü tasak asütsü."